

故宮博物院藏

四庫

全書

撤出本

彙編

第二十七冊

故宮博物院編
故宮出版社

故宮博物院藏

四庫

全書

撤出本

彙編

第二十七冊

故宮博物院編

故宮出版社

第二十七册 目錄

南北史合注卷一百九十一—卷一百九十一	一
卷一百九十	三
卷一百九十一	一六五
南唐書合訂	二三七
卷一	三〇五

欽定四庫全書

史部

南北史合注卷一百九十

欽定四庫全書

南北史合注卷一百九十

明 李清 撰

列傳第九十二

北史一百四

文成馮后

宣武胡后

元六修

元實君

元紹

宗受

乙渾

蕭寶寅



爾朱兆

元鷲

元世儻附

宇文護

張衡

宇文弼

司馬德戡

裴虔通

元敏

王世充

兄世渾附

題逆后賊臣

或問於予曰子舉馮胡兩后而賊之何也前史有此例否曰無有然儷天子且母天下而皆以弑君無所逃賊

則緣而下之凜如矣若帝子也而逆宗室也而逆文武
諸臣與奄人也而逆皆置散傳散何以懲故予彙為賊
后逆臣傳附夷狄後或曰賊后可乎予曰否夫魏脩齊
洋隋堅等咸大書特書正其弒於本紀嚴帝寧寬后嚴
后寧寬諸臣

文成后馮氏長樂信都人父朗秦雍二州刺史西城郡
公母樂浪王氏后生於長安有神光之異朗坐事誅后
遂入宮太武左昭儀后之姑也雅有母德撫養教訓年

十四文成踐極以選為貴人後立為皇后文成崩故事
國有大喪三日後御服器物悉焚百官及中官皆號泣
臨之后悲叫投火左右救之良久乃蘇獻文即位尊為
皇太后丞相乙渾謀逆獻文年十二居諒闇太后密定
大策誅渾

愚按以太后誅權臣得未曾有深謀秘計惜不詳載
遂臨朝聽政及孝文生太后躬親撫養是後不聽政事
太后行不正內寵李奕獻文因事誅之太后不得意遂

害帝承明元年尊曰太皇太后復臨朝聽政后性聰達
自入宮掖粗學書計及登尊極省決萬機孝文詔罷鷹
師曹以其地為太后立報德佛寺太后與帝遊於方山
顧川阜有終焉之志因謂羣臣曰舜葬蒼梧二妃不從
豈必遠祔山陵然後為貴哉

愚按馮后為此言蓋亦自愧失節難見先皇於地下
耳

吾百歲後神其安此乃詔有司營壽陵於方山又起永

固石室將終為清廟太和五年起作八年而成刊石立碑頌太后功德

酈道元水經注曰方陵上有文明太后陵陵東北有高祖陵二陵南有永固堂堂之四隅榭階欄檻及扉戶梁壁椽瓦悉文石也檐前兩柱採洛陽八風谷石為之雕鏤隱起堂之内外四側以文石為椽並隱起忠孝之容題刻貞順之名廟前鑄石尤佳左右列栢四周迷禽闔日南川表二石開御路下望靈泉宮池

皎若圖鏡

太后以帝富於春秋乃作勸戒歌三百餘章又作皇誥十八篇文多不載太后立文宣王廟於長安又立思燕佛圖於龍城皆刻石立碑又制內屬五廟之孫外戚六親總麻皆受復除性儉素不好華飾躬御縵繒宰人上膳按裁徑尺羞膳滋味減於故事十分之八嘗以體不安服菴閭子宰人昏而進粥有蠅蚘在太后舉匕得之帝時侍側大怒將加極罰太后笑而釋之自太后臨朝

專政孝文雅性孝謹不欲參決事無巨細一禀太后太后多智猜忍能行大事生殺罰賞決之俄頃多有不關帝者是以威福兼作震動内外故杞道德王遇張祐符承祖等拔自微閭歲中至王公王廩出入卧内數年便為宰輔賞賚千萬億計金書鐵券許以不死李冲以器能受任亦由見寵幃幄密加賜賚不可勝數

南齊書魏鹵傳曰輔國將軍劉縝兩使鹵太后馮氏悅而親之

后性嚴明假有寵待亦無所縱左右纖介之愆動加捶楚多至百餘少亦數十然性不宿憾尋待之如初或因此更加富貴人人懷於利欲至死不思退太后曾與孝文幸靈泉池宴羣臣及番國使人諸方渠帥各令為其方舞孝文上壽太后欣然作歌帝亦和歌遂命羣臣各言其志於是和歌者九十人太后外禮民望元丕游明根等頒賜金帛輿馬每褒美馭等皆引丕參之以示無私又自以過失懼人議已小有疑忌便見誅戮迄后之

沒孝文不知所生若李訢李惠之徒猜嫌覆滅者十餘家死者數百人率多枉濫天下寃之

魏書靈徵志曰太和元年五月京師有雌鷄二首生冠如角又同月有狐魅截人髮皆太后信任羣小行多不正之徵

十四年死於太和殿年四十九其日有雌雄雉集太華殿帝勺飲不入口五日毀幕過禮謚曰文明太皇太后葬永固陵日中而反虞於鑒玄殿詔曰尊旨從儉不申罔

極之痛稱情允禮仰損儉訓之德進退思惟倍用崩感
又山陵之節亦有成命內則方丈外裁奄坎脫於孝子
之心有所不盡者室中可二丈墳不得過三十步今以
陵萬世所仰復廣為六十步孤負遺旨益以痛絕其幽
房大小棺槨質約不設明器素帳縵茵窆瓦之物亦皆
不置此則遵先志從冊令俱奉遺事而有從有違未違
者或以致怪梓宮之裏玄堂之內聖靈所憑已一一奉
遵仰昭儉德其餘外事有所不從以盡痛慕之情其宣

示遠近著告羣司上明儉誨之美下彰違命之失及卒
哭孝文服哀近臣從服三司以下外臣哀服者變服就
練七品以下盡除即吉設祔祭於太和殿公卿以下始
親公事帝毀瘠絕酒肉不內御者三年

魏書天象志曰獻文暴崩由文明太后及太后崩孝
文方修諒陰之儀篤孺子之慕竟未能述宣春秋之
義以懲其黨是故胡后循之卒傾魏室豈不哀哉
初帝孝於太后乃於永固陵東北里餘營壽宮遂有終